

أحد إخواني وأحابي كتبله الدكتور أصناف أدوية من ضمن أصناف الأدوية دي فيه دوا كحه 50 جنيه مش 3 جنيه ولا 4 جنيه فالأخ يقول كل شويه يطلع الورقة اللي مكتوب فيها الدواء ويص فيها قبل ما ياخذ الدواء بربع ساعة يتجهز لمراسم أخذ الدواء الكحه اللي بـ 50 جنيه

-القرآن هو الحاجة الغالية اللي شدت قلبك لو انت عارف قيمة فتحة المصحف دي ! لو تعرف فرح الله بالجمع فوق وتحت وهما فاتحين كتاب الله مستشرفين إنهم يفهموه ومستشرفين إنهم يوصلوا لرنا من خلال فهم القرآن ، يا جماعة باذن الله فتحة المصحف تكون فاتحة الفتح باذن الله ، سورة مريم : إحنا هنلتقط أهم المعاني اللي في الواقع بتاعنا وبعد كده إنت لما ترتبط بالقرآن هتعيش مع كلمة كلمة إيه لعل وعسى حد مننا يكون زي أبو سليمان الديрани الذي كان يقوم الليل كل 5 ليالى بإيه مثال : سورة الزلزلة يقعد فيها شهر علشان يقوم الليل بسورة الزلزلة، سورة مريم نازلة إمتى؟! سورة مريم نزلت قبل سورة طه ، سورة طه دي اللي أولها إن عُمر بن الخطاب رضي الله عنه أسلم بسببها لما سمع فواتح طه أسلم بسببها ، عمر بن الخطاب أسلم مع بداية هجرة الحبشة لما تأثر بتضحية المسلمين اللي سابوا أوطانهم إتهز قلبه وده كان سبب إسلامه فيه ناس كتير أوووى بتتأثر بمشاهد التضحية ، لو الملتزمين ضحوا لو الملتزمات ضحوا علشان الدعوة لو شافونا بنضحى بعمرنا علشان الدعوة إلى الله ، ناس كتير أوووى في العالم هتهتز وهتتضم إلى الملتزمين ، إنت بتكلم 5 شباب وبتكلمهم عن ربنا ده بيضحك وده بيسقع ودانه بيخلي 100 شاب راكبين في المواصلات وشايفين المنظر ده قلبه يتهز ويشغل في الدعوة ليه ؟! لأن منظر التضحية بيهز القلب ومنظر إني ضحيت بكرامتي وإعتباري علشان إسم الله يذكر . سيدنا عمر بن الخطاب رضي الله عنه أسلم بسبب فواتح طه يبقى إذا سورة مريم نزلت قبل هجرة الحبشة ، يبقى إذا سورة مريم نازلة آخر المرحلة الجهرية ، يبقى إذا سورة مريم نازلة قبل ما سمية اتقتلت وبعد الصحابة اتعذبوا أشد التعذيب ، سورة مريم نازلة تمهيد لهجرة الحبشة بتقول للصحابة شوفوا مريم اللي سابت الدنيا علشان ربنا ، شوفوا إبراهيم عليه السلام اللي قال "وَأَعْتَزِلْكُمْ وَمَا تَدْعُونَ مِنْ دُونِ اللَّهِ" اللي ساب الدنيا علشان ربنا ، علشان لما يتقالهم سيوا الدنيا علشان ربنا روحوا وسط أفريقيا ووسط أثيوبيا علشان تعبدوا ربنا هناك مش يقولوا لا ! يقولوا سمعنا وأطعنا ، يبقى سورة مريم نازلة في هذا الوقت العصيب كان المتوقع في الوقت اللي اتقتل فيه الصحابة زي سمية كان متوقع في الوقت اللي حرمان الصحابة بتستباح فيه ، وكان متوقع في الوقت اللي كانوا الصحابة بيتجلدوا فيه، الوقت اللي كان الخطاط بيتكوي بالنار فيه ، الوقت اللي كان بلال يتربط رجله في الفرس في حر الصحراء ويتسلخ جلده و فرس بيجرجه ويلف في الصحراء فيه ، في الوقت اللي كان الصحابة بيعذبوا فيه كان المتوقع السورة تنزل

تتكلم عن اصطدام أهل الباطل نفاجئ السورة كلها نازلة كلام عن العبادة , كلها صوامع وعبادة , كلها دعوة إلى الله , كلها كلام عن التربية وثمره التربية , كلها كلام عن الجهد في النفاق , كلها كلام عن الدعوة الأسرية و بناء الأسر المسلمة , يعني إوعوا تستفروا يا جماعة كأن سورة مريم رسالة لنا , إوعوا تكفروا بمنهجكم لما الواقع يضغط عليكم , إوعوا لما تلاقوا أهل الباطل ضد أهل الحق تخرجوا عن السير بتاعكم في الدعوة والتربية والتواصل وكلمة الحق فوق الظالمين , إوعوا تكفروا بمنهجكم , إوعوا تلجئوا لحلول اصطدامية بدل ما تقدم الدعوة تأخر الدعوة لوراء , يبقى إذا إحنا محتاجين السورة دي أوووى يا جماعة , محتاجين السورة اللي نازلة في نفس الواقع اللي عايشين فيه إنهارده , محتاجين السورة اللي بتتكلم عن أخطر بقعة على وجه الأرض في أحداث سياسية شامية وهي القدس سنة صفر ميلادية بتتكلم في الفترة اللي كانوا الرومان محتلين فيها أربع أحماس الكرة الأرضية , في الفترة اللي كانت الأوثان في كل مكان , في الفترة اللي أهل فلسطين واليهود فجروا أشد الفجور , في الفترة اللي كان سيدنا عيسى عليه السلام يصرخ في شوارع القدس يا ورشليم يا قاتلة الأنبياء والمرسلين , في الفترة اللي الناس بعدوا عن الدين بُعد لا يتصور , السورة نازلة جاية أنبياء وقربت بين أنبياء إن كل دول اتعرضوا للقتل قربت بين قصص الأنبياء دي كلها إن كل الأنبياء دول عاشوا في واقع سياسي رهيب وعاشوا في واقع اجتماعي محتدم وعاشوا في واقع شهوات قاتلة , علشان يا إخواني وأخواتي لما يبجي إنهارده واحد ينكر لمنهج الدعوة إلى الله يروح الأول يشوفوا الأنبياء عملوا إيه !! ولما عاشوا في نفس الواقع , إحنا بنتلقى من القرآن وبنمشي على هدي القرآن , نشوف سيدنا عيسى عليه السلام لما شاف زكريا عليه السلام نشر بالمنشار , لما شاف يحيى دبح من أجل راقصة فاجرة , عارفين يعني إيه أنبياء عاشوا في واقع إن نبي يدبح علشان راقصة في شارع الهرم !!! تخيل مثلاً , أنا مش هقولك نبي تخيل مثلاً الشيخ الشعراوي تخيل لو ذبح من أجل راقصة المجتمع هيعمل إيه دلوقتي !!! تخيل بقي إن المجتمع وقتها إن نبي ادبح علشان سالوم العاهرة ومحدث من المجتمع إتحرك !! تخيلوا إن الفساد وصل لدرجة إيه !!!! مش تقولوا مواقع إباحية أو بنات متبرجات دا أنا بقولك نبي ادبح علشان عاهره والمجتمع ساكت !! دا أنا بقولك إن نبي حُكم عليه بإعدام حرقاً زي سيدنا إبراهيم والمجتمع ساكت !! بقولك إن نبي حُكم عليه بالصلب زي سيدنا عيسى عليه السلام والمجتمع ساكت !!! يعني شوف نبي إعدام صلب ونبي إعدام حرق !! أهل الباطل على أهل الحق شكله إيه ؟! ودرجته إيه ؟! في الواقع ده هنشوف بطولات الأنبياء دول , في الواقع ده هنشوف سورة الأنبياء عاملة إيه ؟! هنشوف السورة دي والمنهج إيه ؟! هنشوف واقع لا يقل سوء بل يزيد عن الواقع اللي عايشين فيه , الأنبياء كافحوا قد إيه ,

ضم أسماء الحسنى الحفي قالك يعني إيه الحفي !!! يعني جايه من الحفاوة أكل وشرب وفواكه وعصير وحلويات وحاجة ساقعة حفاوة !!! كل ما تقربي من الله ربنا يستقبلك بحفاوة ، الحفاوة بس مش للفاسد ، الحفاوة لمقامات الإيمان لا حدود لها ، كل ما همتك هتعلی لترقى مقامات الإيمان كل ما تشوف حفاوة ربنا بيبك ، كل ما همتك هتعلی علشان أنا عايزة أوصلك يا رب ، يا رب أنا مش قانع بمستوى الإيمان اللي أنا فيه ، أنا يا رب عايزة قلبي يترقى في الإيمان أكثر ، أنا عايز مقامات يقين أكثر ، أنا عايزة يا ربى سمعي الذي أسمع به ، أنا عايزة يا ربى قلبي الذي أعقل به ، أنا عايزة يا ربى لساني الذي أتكلم به ، أنا عايزة يا ربى يدي الذي أبطش بها ، أنا عايزة يا ربى برجلي الذي أمشي بها ، أنا عايزة يا ربى تسدد خطواتي ، عايزة معيتك يا الله ، للأسف الأستاذ اللي بيدرّس درس فقه وكتاب عقيدة بيفتكر إن حظّه من المجاهدة انتهى !!! اللي بيخطب خطبة ومفكر إن نفسه خلاص لما يقفل عليه باب بيته يقعد يلعب بقى شيخ !!! الأخ اللي بقى داعية من الدعاة نسي إنه يجري على دينه !! نسي إنه يجري في طلب العلم !! نسي إنه يجري من أجل إصلاح قلبه ليهيبه ؟!!!! لأنه بقى شيخ !! إوعاك في يوم من الأيام تبقى شيخ ، إوعاك في يوم من الأيام تمرض ، إوعاك في يوم من الأيام تظن إنك كبرت على المجاهدة !! طووووول ما أنت بتجاهد علشان ربنا ؛ طوووووول ما هتشوف حفاوة الله -والله لو الشباب اللي على القهاوي والشباب اللي في النوادي عرفوا يعني إيه (إِنَّهُ كَانَ بِي حَفِيًّا) لو الناس تعرف زحف على وشهم !!! لو الناس تعرف يعني إيه (إِنَّهُ كَانَ بِي حَفِيًّا) ، لو الناس تعرف حنان الله ! إنت لو خسرت حنان ربنا !! إنت مش خسرت لأن الجمعية نزلت زيت وإنت مش عارف ؟!! إنت مش خسرت إن المحافظة عاملة قرعة على شقق في مساكن شعبية وإنت مش عارف ؟!! أنت خسرت أغلى حب في الوجود ، وأعظم حب في الوجود ، وأكبر قدوة في الوجود ، وأعظم حنان في الوجود ، أفعال الله كلها حنان ، الله سبحانه وتعالى الحنان ، تخيل إنت سورة وصفت ربنا بالحنان وبالود وبالحفاوة وبالرحمة !! يبقى أول حاجة في سورة مريم ما إذا لو أحبك الله ؟!!!! سورة تلهف قلبك بعلاقتك بينك وبين ربنا ، أنتم عارفين سورة مريم عاملة زي إيه يا جماعة ؟! أنتم عارفين لما يكون في العربية بتاعتكم 5 لتر بنزين بس ؟!!!! يعني اللبنة الصفرا نورت ؟!!!! والمفروض إنك تسافر لحد أمريكا بالعربية دى !! ينفع بـ 5 لتر دول تروح بالعربية أمريكا ؟!! لا مش ينفع !!!! يبقى ده هو حالي وحالك بالظبط ؟!!!! أنت يا بني غلبان عامل زى 5 لتر دول ! هما دول طاقتك الحقيقة ؟! أنت يا بني غلبان إنت نقطة دم تتجمد في جسمك يحصل عين تتشل أو ذاكرة تفقد يا رجل تتشل يا نصف جسم تتشل ؟! يا بني إنت غلبان إنت بتتقلب على السرير 18 مرة وإنت نايم لو ربنا سابك مرة هتقع على وشك هيتكسر

عظمك فيها ؟!! يا بني إنت غلبان وعازيز تروح أمريكا بـ 5 لتر !! المطلوب منك كبير جداً !!

مطلوب منك بر والدين , و صلة رحم , بر الجيران , قيام ليل , صيام نهار , عبادة , دعوة , طلب علم , تلاوة قرآن , حسن خلق , سعي على رزقك , إصلاح قلبك , تركية نفسك , تجديد التوبة من ذنبك , طب أنا طاقتي ضعيفه أعمل إيه ؟؟؟!! أهو ده مدد الله سبحانه وتعالى ؟ علشان تعرف إن بدون مدد الله مش هتقدر تعمل حاجة لما واحدة تتجوزه جوزها طالب طلبات وهي حامل وعيل على إيدها وعيل بيعط جوه والدنيا اتكبست عليها ووالدتها زعلانة علشان مش بتسأل عليها وصحباتها مقفلين إنها مش بتترد عليهم ؟! مش عارفة تحفظ قرآن ولا عارفة تعمل حاجة الدنيا متكبسة عليه !!! (الحل الوحيد) : مددك يا الله (يعني إيه مدد الله : يعني خالد بن الوليد لما في غزوة مؤتة مسك 9 سيوف واتكسروا في إيده وإيده مش اتكسرت جاب القوة كلها دي منين ؟!! هو ده بقى مدد الله , زي علي بن أبي طالب رضي الله عنه في خيبر لما مسك باب الحصن بإيده وعمله درع كان القوة دي منين !!! حد يقدر يمسك باب المسجد ويعمله درع ويحارب به !! هو ده مدد الله , زي سيدنا محمد صلى الله عليه وسلم قعد 3 أيام مواصل الصيام يعني يشرب مايه المغرب ويكمل لثاني يوم المغرب من غير طعام ولا شراب ؟!! 3 أيام بيصلي طول الليل وشغال في مهام العبادة والدعوة طول الليل والنهار جاب القوة دي منين ؟!! هو ده مدد الله , سيدنا موسى عليه السلام لما قعد على جبل الطور بلا طعام ولا شراب إزاااااا ؟!! مدد الله , سيدنا موسى عليه السلام لما أقعد 3 أيام في بطن الحوت يصلي ويسبح في الوحشة إزاااااا ؟؟ مدد الله , سيدنا جبريل لما شال القرى والمدن على جناح واحد خسف بيهم الأرض جاب القوه دي منين ؟؟؟ مدد الله , عطاءات ربنا للصالحين ؟! السورة مليانة عطاءات ؟!! سبحان الله طول عمري بحب سورة مريم والأنبياء والصفاءات لأن فيهم عطاءات من الله , مقابل العبادة عطاءات مهولة من الله ! طب حد يقدر يقول عطاءات سورة مريم كده ؟!

(1- ذِكُرْ رَحْمَةَ رَبِّكَ عَبْدَهُ زَكَرِيَّا)

(2- يَا زَكَرِيَّا إِنَّا نُبَشِّرُكَ بِغُلَامٍ اسْمُهُ يَحْيَى لَمْ نَجْعَلْ لَهُ مِنْ قَبْلُ سَمِيًّا)

(3- فَكُلِّي وَاشْرَبِي وَقَرِّي عَيْنًا)

-السوره كلها عطاءات وأولها بشرى ونهايتها بشرى السورة بتقولك أفرح لسورة بتقولك أفرح السورة بتقولك الكلام ده جميل السورة بتقولك طول ما إنت في ولاية ربنا أفرح وأبشر وأقبل على الله سورة بتبهرنا بالعلاقة الرهيبة التي بين الله وبين أوليائه ماذا لو تولاك الله؟؟ عازيزين ننقل بسرعة يا جماعة الخيوط لأن الخيوط كثير أوي الخيوط التمهيدية التعريفية بالصورة الحاجة الثالثة في سورة مريم يا جماعة سورة مريم عرض مزهل يعني على سبيل المثال دلوقتي كل الناس بترزق

ولا مبترزقش بترزق ولكن ده بيرزق بشكل مرتب وده دكتور جاله كشف وده مهندس جاله مصلحة وده راجل جاله شغلانة فكل الرزق بأسباب فالناس من كتر ما الرزق كله بأسباب فيه حجاب أسباب فالناس قلبها اتعلق بالأسباب ونسيت الفاعل الحقيقي وهو الله فأحياناً ربنا بيكسر السبب ليذكر الناس بالفاعل الحقيقي وهو الله سورة مريم بقى رفع حجاب الأسباب سورة مريم عطاءات بلا أسباب سورة مريم تهتك الحجب عرض مزهل لواحد عنده تسعين سنة وبيرزق بولد عرض مزهل لواحدة بترزق ولد بلا زوج وهى بتأوى إلى النخلة ربنا وراها نفس الآية اللي حصلت معاها أوت إلى جزع نخلة ميت ربنا قالها هزبه طب يارب ده جزع نخلة ميت فلحظة أثمر وطلعت الرطب وتساقطت عليها الرطب بدون مايلقح النخل بدون تلاقي ذكر وأنثى إلى النخل طلع زي ما إنتى بدون تلاقي ذكر وأنثى حملتي زي ماحملك جه علطول ممكن فلحظة كثير من الأقوال إنها لم تمكث تسع شهور أهو هو النخلة دى بردو في ثوانى طلعت الرطب وأسقطتها عليكي الله قادر ياجماعة السورة كلها معجزات نبي بيتكلم في المهد في المهد طب أحباله الصوتية وعضلات الحنجرة طب إزاي الله قادر سبحانه وتعالى نبي بترمى في النار ويطلع منها سليم إزاي الله سبحانه وتعالى قادر نبي يرفع في السماء الله سبحانه وتعالى قادر، يبقى سورة مريم ياجماعة سورة "هُوَ عَلَيَّ هَيِّنٍ" سورة سورة بتطمعك في ربنا انتوا عارفين يا إخواني يعني الواحد بيعحاول يرتب حياته بقالي سنين بحاول أرتب حياتى بحاول والحياة مليانة تفاصيل عشان تدير حياتك وتعرف إن الموضوع ده بتاع يوم السبت الفجر إنما النقطة دي يوم الحد الضهر إنما النقطة دي في النص ساعة اللي قبل العصر في الآخر الأخ خالد اللي رزقت بيه من شهر كده الأخ خالد ده علمني والله يا إخواني أجمل سياسة في حياتي الواد ده أول مايحتاج حاجة يعمل إيه ماشاء الله يقوم فاتح بقة تلاقي نص وشه بقى بق ويصرخ إن من يوم ما اتولد مبظبطش منبه لقيام ليل اللهم لك الحمد من يوم ما اتولد انا بنام متوكلاً على الله هتصحى يعني هتصحى أو مايحتاج أي حاجة يعيط يعيط ده البيت كله يتقلب ممكن يكون بيعيط عشان جعان ممكن يكون بيعيط عشان نملة قرصته ممكن بيعيط مضايق إنه نايم ومحدث شايله ممكن يكون بيعيط منتاش عارف بيعيط ليه ولازم تعرف ولازم البيت كله يكتشف والبيت كله يتقلب قوت الله طب ماتخليك ذكي ياجدع إنت بدل ماتقعد تخطط طيب ما تعيط إنت كمان ماتعيط أقف بين إيدين ربنا وعيط كل أما تحتاج حاجة عيط والله يا إخواني أروع سياسة في الحياة عيط أبكيه كل حاجة بمعنى كل حاجة بص كل حاجة دي كلمة تشمل كل شئ في حياتك كل تفاصيل وكليات وجزئيات وجماليات حياتك كل شئ عيط لربنا تعرف تعيط لربنا سورة مريم أنا لا أنسى تعليق أحد من فسروا السورة وهو مذهول يقول أنا كنت أبص على السورة وأنا مذهول إيه المعجزات دي

كلها عشان كده السورة دي هتزرع يقين في قلبك لماذا عاملهم الله بلا أسباب ربنا عامل دول بلا أسباب ليه لأنهم عاملوا الله بلا أسباب لأنهم إرتقوا في اليقين الكامل فربنا عاملهم بمعاملة غير البشر لأنهم عاملة ربنا بمعاملة غير البشر قضية كبيرة أوي النقطة اللي بعد كده طيب ياعم ربنا ولايته جميلة و ربنا حبه جميل وربنا سبحانه وتعالى اصطفائه جميل طيب إزاي كيف يتولاني الله كيف ماهي الصورة بتقولك ربنا عمل للصالحين إيه والصالحين عملوا عشان ربنا إيه نقطة مهولة يا جماعة نقطة عملوا عشان ربنا إيه مش بقولكوا إنها نازلة قبل هجرة الحبشة عشان بعد أسابيع وشهور هيسافروا الرسول قال للصحابة سييوا مكة سييوا تجارتكم سييوا سييوا أوضاعكم المستقرة سييوا أهلكم سييوا دنيتمكم وهاجروا اللي مراته لسه كافرة يسييها اللي ولاده ماسلموش يسييهم اللي أمه وأبوه كفره يسييهم سييوا أوطانكم وروحوا عيشوا وسط أرض الغرباء البعداء عيشوا فيها سنين إعبدوا ربنا لحد ما ربنا يفرجها علينا بيئة إيمان يمكن لنا فيها وهي المدينة المنورة يا إخوانا أنا عايزك تتخيل معايا كده الصحابة اتربوا على معاني شكلها إيه سيدنا زكريا واحد عنده تسعين سنة وواقف يقول ربي إني وهن العظم مني واقف يصلي ولسه له ثلاثين سنة كمان قبل مايموت سيدنا زكريا عليه السلام نشر بعد ثلاثين سنة من الموقف ده في ذات الله من أجل كلمة الحق سيدنا يحيى اللي عايش في الصحرا عايش على العسل البري وعلى الجراد عليه السلام السيدة مريم عليها السلام السيدة مريم دي يا إخوانا اللي اتسمى بإسمها السورة إنت عارف يعني إيه يعني من وسط العمالقة زكريا وعيسى ويحيى وإبراهيم وموسى وإدريس عليهم السلام من وسط العمالقة دول ها سميت مريم معناها إن أي مستوى إيماني وصلت له هذه المرأة وصلت له هذه المؤمنة بالله سبحانه وتعالى أي مستوى لما تشوف سيدنا عيسى سيدنا عيسى عليه السلام يا إخوانا استحمل عشان ربنا إيه سيدنا عيسى عليه السلام لما كان يصرخ في أهل القدس يا أورشليم ياقاتلة الأنبياء وراجمة المرسلين معناها إنه شاف إنهم عملو إيه عملوا في الأنبياء إيه عملوا في سيدنا زكريا وسيدنا يحيى إيه ومع ذلك اشتغلوا سيدنا إبراهيم عليه السلام جه في بلد الكلام عن ربنا جريمه يعاقب عليها القانون الكلام عن ربنا يعني إنت دلوقتي مثلاً ممكن يكون فيه حاجات لو عملتها يحصل مثلاً اصطدام بأهل الباطل أو الظالمين سيدنا إبراهيم كان مجرد الكلام عن الله معناه الإعدام عليه السلام، إنت متخيل سيدنا موسى عليه السلام بعده كان الحاكم بيقول أنا ربنا إنتوا متخيلين الواقع الذي عاش فيه هؤلاء إنتوا متخيلين واستحملوا عشان ربنا إيه سيدنا إبراهيم ساب الدنيا كلها واعتزل وأكثر واحد لف الأرض عشان ربنا السيدة مريم انتبذت من أهلها مكاناً شرقياً سابت الناس عشان تنفرغ لعبادة الله عشان كده السورة مليانة تضحيات السورة مليانة مجاهدة في ذات الله عبادة التضحية وعبادة المجاهدة اللي

معظم المتلزمين والمتلزمات لا يعبدون الله بها ودي العبادات اللي فتح ربنا يبيتنزل تنزل على أصحابها عبادة التضحية وعبادة المجاهدة إنك إنت تتعب عشان توصل لربنا إنك تضحي عشان توصل لربنا سبحانه وتعالى القضية دلوقتي يعني قبل ماندخل بقى يعني في أخطر نقطة تهمنا دلوقتي في سورة مريم وهي علاقة السورة بالواقع اللي إحنا فيه الرسايل اللي السورة بتبعتهالنا عايزين نتكلم عن نقطة واحدة وهي أسباب الاصطفاء سورة مريم بتتكلم عن أسباب الاصطفاء يعني إيه أسباب الاصطفاء اشمعنى دول اللي ربنا اختارهم واهبى جميل فيه كسب يعني فيه حكمة أه إيه اشمعنى دول يعني لما ربنا سبحانه وتعالى يقولك على سيدنا إسماعيل عليه السلام إنه كان صادق الوعد وكان رسولاً يبقى ربنا لما بيختار بيختار أهل الأخلاق يبقى فيه سبب للاصطفاء لما ربنا قبل ما يقول ووهبنا له من رحمتنا أخاه هارون يقول قربناه نجياً يبقى عبادة المناجاة هي اللي فتح عليه بعدها لما ربنا مع سيدنا موسى يقول "وَأَذْكُرْ فِي الْكِتَابِ مُوسَى إِنَّهُ كَانَ مُخْلَصًا وَكَانَ رَسُولًا نَبِيًّا" يبقى اللي أخلصوا قلبهم لله هما اللي بيصطفوا لما ربنا يقول مع إبراهيم عليه السلام "وَأَذْكُرْ فِي الْكِتَابِ إِبْرَاهِيمَ إِنَّهُ كَانَ صِدِّيقًا نَبِيًّا" يبقى اللي بيوصلوا لمقام التصديق الكامل واليقين الكامل اللي ربنا بيصطفاهم لما السيدة مريم عليها السلام ربنا يقول وَأَذْكُرْ فِي الْكِتَابِ مَرْيَمَ إِذِ اتَّخَذَتْ مِنْ أَهْلِهَا مَكَانًا شَرْقِيًّا ﴿١٦﴾ فَاتَّخَذَتْ مِنْ دُونِهِمْ حِجَابًا فَأَرْسَلْنَا إِلَيْهَا رُوحَنَا فَتَمَثَّلَ لَهَا بَشَرًا سَوِيًّا ﴿١٧﴾ حجابا ،اعتزلت الدنيا من أجل العبادة فأرسلنا إليها روحنا فاختارت الله على كل شئ فاختارها الله على كل شئ فمن اختار الله على كل أحد اختاره الله على كل أحد ومن صفى قلبه لله صفى الله له ومن كدر كدر عليه سبحانه الله يبقى دي قواعد يا جماعة يبقى ربنا بيصطفى مين " ذَكَرَ رَحْمَتَ رَبِّكَ عَبْدُهُ زَكِيًّا ﴿٢﴾ " أي كثير الذكر فلما أكثر من ذكر الله ذكره الله برحمته سبحانه وتعالى يبقى قضية مين اللي ربنا بيصطفاهم مين اللي ربنا بيختارهم مع سيدنا إدريس وَأَذْكُرْ فِي الْكِتَابِ إِدْرِيسَ إِنَّهُ كَانَ صِدِّيقًا نَبِيًّا ﴿٥٦﴾ نفس القضية يا جماعة أولئك الذين أنعم الله عليهم جميلة أوي دي أوي أولئك الذين أنعم الله عليهم مِنْ النَّبِيِّينَ مِنْ ذُرِّيَةِ آدَمَ وَمِمَّنْ حَمَلْنَا مَعَ نُوحٍ وَمِنْ ذُرِّيَةِ إِبْرَاهِيمَ وَإِسْرَائِيلَ وَمِمَّنْ هَدَيْنَا وَاجْتَبَيْنَا إِذَا تُتْلَى عَلَيْهِمْ آيَاتُ الرَّحْمَنِ خَرَوْا سُجَّدًا وَبُكِيًّا ﴿٥٨﴾ في الآخر كل ده ليه يارب تُتْلَى عَلَيْهِمْ آيَاتُ الرَّحْمَنِ خَرَوْا سُجَّدًا وَبُكِيًّا ﴿٥٨﴾ عارف يعني إيه خرو يعني زي واحد اترمي من البلكونة فقد القدرة في السيطرة على جوارحه يعني انهار ساجداً لا ارادياً من كمية الانفعال بجلال الله اللي في قلبه خرو سجداً وبُكياً سيدنا عمر رضي الله عنه لما كان يسجد كان يبكي يقول يا عمر هذا السجود فأين البكاء أين البكاء خروا سجداً وبُكياً يبقى اللي هيحقق المقام ده ربنا هينعم عليه يبقى اللي هيعاملوا ربنا صح ربنا هيعاملهم هذه المعاملة يا جماعة صراحة يعني كما قيل سورة

مريم الكلام مييتشرحش يا جماعة الكلام مييتوصفش سورة مريم دي علاقة هائلة ما بين ناس ليس في قلوبها إلا الله وبين ربنا سورة مريم دي عاشت عشانه وربنا غمرها بعطاءاته ناس عاملته بلا أسباب وربنا إداها معجزات ناس حبت ربنا يكل ذرة في كيانه وربنا ملئ حياتهم بالحنان والرحمة والحب والود والحفاوة في كل لحظة في حياتهم ناس تولاهم الله وناس اصطفاهم الله ربنا مش جايبلنا القصص دي عشان نتفرج عليها ونحطها في متاحف ونقعد نبص كده ونمص لمون قدامها ونقول سبحان الله عليه الصلاة والسلام ربنا إدانا الصور دي عشان نقندي بيها عشان يقولنا إن اللي عايز يبقى معاهم في الجنة يمشي على الطريق بتاعه ، الحمد لله وكفى وصلاة وسلام على عباده الذين اصطفى اللهم لك الحمد كله ولك الفضل كله وبيدك الخير كله وإليك يرجع الامر كله نبيك محمد صلى الله عليه وسلم في الأولين والآخرين والملائم الأعلى يوم الدين، قلنا سورة مريم أحداثها حصلت سنة كام يا جماعة صفر ميلادياً الوقت ده كانت الامبراطورية الرومانية كانت ماسكة ثلاث أربع أخماس العالم الوقت اللي كان الضلال مستشري في الكرة الأرضية هو اللي حصلت وقائع الأحداث دي الوقت ده يا جماعة كان فيه حاجتين أول حاجة أن الواقع مستفز جداً أهل الباطل كانوا معذبين مطاردين زي ما أنتم شايفين يعني إن شاء الله لو لحقنا نتكلم في ترابط السورة أول نبي سيدنا ذكريا عليه السلام مات ازاى؟ قتل بالمنشار تاني نبي في السورة كان مين ؟ يحيى ذبح ثالث نبي في السورة سيدنا عيسى عليه السلام حكم عليه بالإعدام صلباً وربنا نجاه هو والسيدة مريم عليهما السلام ،رابع نبي في السورة سيدنا إبراهيم عليه السلام حكم عليه بالإعدام حرقاً وربنا سبحانه وتعالى نجاه وخامس نبي سيدنا موسى وسيدنا موسى عليه السلام ،فرعون أصدر حكم مباشر بإعدامه وربنا نجاه "ذُرُونِي أَقْتُلْ مُوسَى" سادس نبي سيدنا إسماعيل سيدنا إسماعيل عليه السلام كان هيزبح أصلاً اللي ربنا أرى سيدنا إبراهيم عليه السلام أن يذبحه وكان هيزبح في ذات الله أنا عايز أقولكم إن الأنبياء دول كانوا عايشين في واقع شكله إيه كانوا عايشين في واقع شديد الخطورة وكانوا شغالين في الدعوة وكانوا مبيطلوش شغل في الدعوة كان العشر حملات اللي عملناهم قبل كده في الدعوة إلى الله حملة مش قادر أسكت وحملة دوق طعم السعادة وحملة مفيش بديل وحملة فرسان الدعوة علشان ناخذ بالناس يا جماعة من الكلام اللي كان فيها مفيش بديل لو منجحناش في الدعوة والتربية والأخوة والعبادة مش همنجح بعد كده في حاجة ياعم محدش يقدر يقول إن الجهاد ليس هو السبيل الأعظم لنصرة الدين ولكن النبي صلى الله عليه وسلم جاهد بعد لما نجح في الدعوة والتربية لازم الأول يطلع رجالة متربين نازلين الواقع لازم الأول يا إخوانا ناخذ الطريق صح أدي الطريق أهو مرسوم عاشوا في واقع وجهوا الظالمين وأهل الباطل ومش بس كده عاشوا في واقع في غاية الفساد في غاية

الفساد يعني لما راقصات الملاهي الليلية لهم صلة بالملوك و يذبح الأنبياء من أجل هؤلاء والعياذ بالله يبقى معناه إيه يبقى انت عايش فى مجتمع شكله إيه متقوليش بقى مواقع إباحية وكليات وكلام فاضي يا إخوانا الأنبياء كانوا فى واقع رهيب ومع هذا ركزوا فى الدعوة وقاتلوا من أجل الدعوة وربنا فتح ليهم القلوب بهذا المنهج دلوقتى بعد 25 يناير الكلام فى الدعوة كلام كأنك تؤذن فى مألطة لو قلت كلمة فى السياسة البلد كلها تقفلك كده أهو تلاقي ودانهم وقفت وطرقت كده أهو قربت تطلع دخان وهما مركزين فى أي كلمة فى السياسة تكلم عن ربنا وقلبك يتحرق محدش عايز يسمع محدش كان عايز يسمع عن الجنة والنار كان الحل مش إن كثير مننا يستسلم ويترك الدعوة ويشغل فى ما يطلبه المستمعون الحل إن إحنا نقاتل من أجل الدعوة إلى الله يبقى فى فلسطين المحتلة فى القدس المحتلة حدثت هذه الأحداث السورة فيها رسائل للنبي صلى الله عليه وسلم والصحابة رضوان الله عليهم فى الواقع بتاعهم ولينا فى الواقع بتاعنا رسائل للصحابة بتقولهم إيه أول رسالة فى السورة اوعوا تكفروا بالمنهج بتاعكم اللي هي رسالة للأخوة والأخوات إوعوا تكفروا بالمنهج بتاعكم اوعوا لما تلاقوا أهل الباطل اتجبروا تكفروا بمنهج الدعوة والتربية ومنهج الإصلاح وإنك لازم وسط الضغوط تنجح الأول فى الدعوة والتربية بعد كده ربنا يأذن لك بجهاد الظالمين لكن لازم الأول تنجح فى الدعوة والتربية يعني لازم الأول تبين هذا المنهج العظيم وتنجح فيه لأن فيه أحياناً ناس فى وسط الضغط بتكفر بالمنهج بتاعنا لا علشان كدة وأنتم شايفين سيدنا زكريا عليه السلام فى أول قاعد فى الصومعة بيصلى شايفين السيدة مريم قاعده فى الصومعة بتسبح وشايفين اوعوا تفتكروا إن الدنيا برا كانت هادية والشوارع فاضية ده انت لو بصيت من الشباك قلب هيقف لو بصيت من شباك الصومعة دي على الأحداث اللي كانت بتحصل برا قلبك كان هيقف ومع هذا إحنا لينا خط سير لازم نتسلح بيه وتمر الايام وببشت إن ده الكلام الصح متستناش تدفع من عمرك 20 سنة تجرب علشان ترجع تقول والله كان هو ده الطريق صدق السور والقرآن من الأول وامشى ورا القرآن من الأول متعميلش زى كثير من أبناء التيار الإسلامى الآن يبص للواقع ويتخيل بدماعة حل وبعد كده يلوى أعناق الآيات علشان تقول إن الحل بتاعه هو الصح بص للقرآن شوف القرآن بيقول إيه وبعد كده إنزل الواقع وأنت موقن به وأنت مؤمن به إحنا بدأنا الدرس ده بكام ياجماعة إحنا الدرس ده بدئنا 30-6 ياجماعة إحنا بدئين الدرس ده بكام واحد بادئين الدرس ده فى ظروف شكلها إيه الوقت بفضل ومنة الله شوف قد إيه على النت وشوف قد إيه فى الدرس وشوف أثر الدرس بفضل الله حتى برا شوف بفضل ومنة الله سبحانه وتعالى يا إخوانا لا نياس من طريق الدعوة والتربية أنا لما بشوف ثمرة الورش وثمرة تحفيظ القرآن وبتقابل مع الأخوة فردياً وبتطلع

على الجهد اللي الأخوات بيعملوه وبشوف الجهد اللي الأخوة والأخوات على النت بيعملوه أنا قلبي بيرقص فرحاً فعلاً فيه ناس بتتربى فعلاً ناس بتطلع فعلاً ناس بتؤمن يبقى لازم تنجح في دى وربنا هيستعملك في اللي بعدها إنما الاستعجال لا يؤدي إلى شيء أما الرسالة الثانية رسالة لسيدنا محمد صلى الله عليه وسلم بقى والآن هي رسالة للعاملين في دين الله سيدنا زكريا عليه السلام يا جماعة إنسان فاهم سيدنا زكريا عليه السلام نبي عنده فهم الأنبياء نبي يبهرك بفهمه أنا بحس في شخصية سيدنا زكريا إن راجل الدين لما بيكون فاهم بيكون حاجة حلوة قوي بيبقى رحمة للطلبة اللي بيقدروا يسمعو له بدل مايضيعوا عمرهم إن في واحد ممكن يوجه طالب ممكن يضع له عمره وهو مش عارف بيوجه في إيه في واحد زى سيدنا زكريا عليه السلام أول قصة قصة سيدنا زكريا عليه السلام بعد كده قصة يحيى بعد كده قصة مريم بعد كده قصة عيسى عليهم السلام حد يقدر يقول إيه الرابط بين الأربع قصص دول حد من الشباب بتوعنا يقولو إيه الرابط بين القصص دول زكريا عليه السلام هو المربي والثلاثة اللي بعد كده طلبة اتربوا عنده تلاميذته يحيى وعيسى ومريم عليهم السلام دول طلبة سيدنا زكريا فربنا جاب المربي في الأول وبعد كده جاب الانبياء عيسى ويحيى ومربي ربى أنبياء يا إخوانا ربنا سبحانه وتعالى جاب ثمرة التربية التربية بتطلع أنبياء يا جماعة التربية بتطلع ناس ربنا يعملها معجزات ويغير لها السنن التربية عملت طفرات فى الواقع حتى لانكفر بهذا المنهج سيدنا زكريا عليه السلام شخص يقول إيه "رَبِّي إِنِّي وَهَنَ الْعِظْمُ مِنِّي وَاشْتَعَلَ الرَّأْسُ شَيْبًا" انا ياربى معدتش قادر اشيل ولو شيلت النهاردة مش هشيل بكرة "وَإِنِّي خِفْتُ الْمَوَالِيَ مِنْ وَرَائِي" سيدنا زكريا عليه السلام فاهم الواقع ساعات بيبقى واحد بيدعوا بس متدروش سيدنا زكريا عليه السلام فاهم الواقع الناس دي يارب مش هتنفع تشيل الناس اللي واري لو أنا مت هتخربها هتخربها مفيش الصديق الكافي ولا الفهم الكافي للدين طيب الحل إيه "هَبْ لِي مِنَ لَدُنْكَ وَلِيًّا" إدينى ابن ياااااااااااااااااااا دا على مراتك لما تحمل وعلى الابن لما يتولد وعلى لما الطفل يكبر دا انت قدامك 30 سنة يا زكريا عليه السلام أنا مستعد أصبر 30 سنة بس ابقى ماشى صح علشان كده الرسالة للنبي عليه الصلاة والسلام اوعى تستعجل الاستعجال ضيعنا قد أيه الاستعجال دمرنا قد إيه الاستعجال دمر مسيرة الحركة الإسلامية قد إيه سيدنا زكريا عليه السلام راجل دين فاهم واحد بيربي وهو فاهم يعني إيه تربية واحد بيصلح في الواقع وهو فاهم الواقع وهو عارف قال "هَبْ لِي مِنَ لَدُنْكَ وَلِيًّا" مقالهاوش يارب هب لى مائة ألف قال أنا عايز واحد واحد ليه أصل القضية معديتش عدد الملتزمين والملتزمات بقوا بالكوم القضية مش عدد القضية إن التيار الإسلامي يفترق إلى قادة إدينى واحد أربه تربية قائد يقود الواقع ده كله للانقاذ يارب سيدنا زكريا عليه السلام فاهم يا إخوانا وفاهم إن

الموضوع يحتاج وقت وبقولك إني خفت الموالى من ورائى يعنى إيه يعنى دارس الحركة الإسلامية وفاهم كويس قوى فيها كوادر تشيل لو الصف الأول مات يبقى فيه ناس تشيل واحد بيخطط لبعده موته فين النموذج ده دلوقتى فين النموذج اللي مشغول بنفسه في الدين ومشغول بالدين بعد موته جولده مائير حطيت خطة إسرائيل وهي عندها 14 سنة تيودور ارسل حط خطة بناء دولة إسرائيل ومات قبل ما يشم نفسها ب 50 سنة علشان كده موسى ديان لما قالوله إن النبي محمد عليه الصلاه والسلام قال إن الحجر هينطق عليكم قال أنا مصدق هذا الكلام ولكن لا إحنا اليهود اللي الحجر هينطق علينا ولا أنتم المسلمين اللي الحجر هينطق ليكوا دا إحنا ناس من التجرد بنرسم خطة ل 500 سنة قدام وإحنا عارفين إن إحنا مش هنشفها وأنتموا عايشين لأنفسكم عمالين تهقوا في الشهوات والملذات قاعدين تجروا ورا الدنيا وتعبدوها أنتم اللي الحجر يينطق ليكوا وإحنا اللي ضحينا بعمرنا علشان عقيدتنا اللي الحجر ينطق علينا سيدنا زكريا عليه السلام نبي بيخطط للدين إني خفت الموالى من ورائى يبقا إذا بعد لما أموت لازم أربى جيل علشان لما أموت الجيل ده يشيل بعد موتى شايفين التخطيط سيدنا زكريا عليه السلام لما راجل الدين وهو بيحط خطة التربية من قبل ما يبشر بيحى أصلاً يقول "يَرْثُنِي وَيَرِثُ مِنْ عَالٍ يَعْقُوبُ" هخليه ياخذ مني ومن غيري يارب مش هقفله عليّ بس مش هقول له أحضر درسي ومتحضرش درس دعاة تانيين مش هقوله الجماعة دي وملكش دعوة بجماعات تانية أنا هفتح له في الواقع هفتح له أفق يارب مش التعصب اللي دمر الحركة الإسلامية والخلاف والتنازع اللي دمر الحركة الإسلامية كنت لسة بقرأ في اجتياح التار لبخاره وقلبي يتمزق لما الأمة تمزقت وتفرقت ربنا سلط عليهم التار عملوا فيها إيه البخارى البخار بلد البخاري لما التار حاصروها اتقسم الناس نقاتل ولا نفتح لهم الأبواب المعظم قال نفتح الأبواب عايزين نعيش عايزين نربي العيال عايزين نعلف البهيمتين عايزين نجوز البت عايزين نشوف مستقبلنا وشوية قلة قالوا إحنا لازم نقاتل هنعصم بالحصن بتاع المدينة ودخلوا القلعة بتاعت المدينة دخلوا وطبعاً التار حاصروا القلعة لحد ما دبخوا اللي معتصمين فيها وبعد كده الناس اللي خانعين مسكوهم دبخواهم وإغتصبوا النساء قدام أزواجهم وقدام أولادهم وولعوا في المساجد والمدارس وولعوا في البلد وخدوا كل فلوس البلد ودبخوا أهل البلد وخربوا البلد كل ده ليه وبعد كده كملوا على بلد بلد من العالم الإسلامي علشان الفرقة علشان التمزق علشان التنازع فيقول "يَرْثُنِي وَيَرِثُ مِنْ عَالٍ يَعْقُوبُ" لما راجل الدين يبقى فاهم لما يبقى فى ناس فاهمة دين وهي بتشتغل مش حماس وبس مش حرايق وبس مش ولعة وبس فاهمين تربية فاهمين توجيه فاهمين ده علشان يبقى راجل محتاج إيه لما يطلع موجهين فاهمين وطلبة مضحيين مش أول لما الأخت يتقدم لها الأخ يبقى عليه العوض

معدتش تشوفها وأول ماتجيب عيلين يبقى كل دينها ضاع يا إخوانا عايزين سورة مريم نستفيد منها في ديننا سورة مريم رسالة للنبي صلى الله عليه وسلم بعدم الاستعجال ورسالة إلى النبي صلى الله عليه وسلم إن فيه خط سير زى سيدنا زكريا لما كان شغال في التربية "هَبْ لِي مِنْ لَدُنْكَ وَلِيًّا" وكان شغال في الدعوة خرج على قومه من المحراب سورة مريم رسالة للأخوات رسالة للصحابيات يا جماعة المرأة اللي في السورة هي اللي إتسمى بإسمها السورة السيدة مريم دي أنت به قومها شوف أنت ديه أنت جى زى الريح كده لما تأتى أسد نازل يعني بطلة بتواجه الواقع كله لوحدها السيدة مريم عليها السلام قالت كلمة لسيدنا زكريا عليه السلام وهو من عند الله قلبت حياة سيدنا زكريا عليه السلام بيها وبعد كده توجه إلى الله بيحيى وصرف الأمور كيفما تعلمون السيدة مريم عليها السلام دي يا جماعة بطلة دي تلميذة من تلميذات سيدنا زكريا عليه السلام "كَلَّمَا دَخَلَ عَلَيْهَا زَكَرِيَّا الْمِحْرَابَ" كلما دي صيغة إيه؟ صيغة استمرار يعني معناها إن سيدنا زكريا عليه السلام كان مربى يتعهد الطلبة باستمرار طيب السيدة مريم عليها السلام مجتهدة في الدين انت مالك بقى سببها مجتهدة في الدين لالا لالا ده المربي اللي فاهم يتعهد الأخ النشيط أكثر من الأخ الكسول لأن الأخ النشيط لو تعهد ده اللي يجد هيطلع من وراء ثمرة سيدنا زكريا عليه السلام مربى فاهم تربية عليه الصلاة والسلام السورة رسالة للمرأة انتم مش قليلين في الوقت الرهيب ده محتاجينكم يا بنتي في الوقت الرهيب ده السورة اتسميت مريم علشان تقول للنساء إنت ليكي دور لا يقل عن الرجال ما هو لو كل واحد جه يهاجر الحبشة مراته قالت له لا مسيبش أهلي كانت باظت كانت خربت يبقى لازم المرأة لازم دينها يعلى هو كمان أنا حزين على كل واحدة معانا تحت وجوزها قاعد في البيت قدام التلفزيون إنها مأثرتش في جوزها إنه بيعجي حزين على كل واحدة قاعدة تحت وأولادها مايصلوش إنها مقدرتش تكافح علشان أولادها حزين على كل واحدة قاعدة تحت ومقدرتش إنها تكافح علشان بيتها يكون مملكة دينية كل الجو السائد اللي فيه ديني ، حزين على كل واحدة كانت معانا وفقدناها لما اتخطبت ولا خلفت ولا اتجوزت معرفتش تعمل خط أحمر لعلاقتها بيئة الإيمان والشحن الإيمانى اللي في حياتها حزين يا جماعة حزين على أوضاع الأخوات حزين على أوضاع النساء الملتزمات حزين على مستواهم في فن الدعوة وهما مش قادرين ينزلوا للمتبرجات والبعاد عن دين ربنا حزين لما كل لما يدخل واحدة لبسها فيه مشاكل المسجد نظارات نارية تصوب لها من المنتقبات كأن هما هيولعوا فيها وهيحرقوها حزين على مستوى أخواتنا نفسي أشوف بطالات عايزين يخرج منهم سمية عايزين يخرج منهم أم عمارة ، عايزين يخرج منهم أم سليم ، عايزين يخرج منهم بطالات يقودو الواقع الاسلامى ويقودو الانقاذ في هذا الوقت " سورة مريم " رسالة

.. من آخر الرسائل اللي فيها بتتكلم عن ثلاث أطفال طفل اسمه يحيى " أَتَيْنَاهُ الْحُكْمَ صَبِيًّا " طفلة اسمها مريم " إِنْتَبَذَتْ مِنْ أَهْلِهَا مَكْنًا شَرْقِيًّا " كان عندها 13 سنة طفل اسمه عيسى عليه السلام وهو في المهد يقول " وَجَعَلَنِي مُبَارَكًا أَيْنَمَا كُنْتُ " دول أطفالنا سورة بتقولكوا ربوا عيالكو ، ربوهم صح بل ربنا يقول " وَوَهَبْنَا لَهُ مِنْ رَحْمَتِنَا أَخَاهُ هَارُونَ نَبِيًّا " " كَانَ يَأْمُرُ أَهْلَهُ " بتقولكوا ابنوا أسر ملتزمة ، ابنوا أسر مسلمة ، كل واحد وكل واحدة لازم يبقى أسرة مسلمة ، أسرة سليمة ؛ لازم الناس تنبهر بينا يا جماعة إن تلاقينا أسر ناجحة إجتماعياً ناجحة في الحب والعاطفة ناجحة في التواصل ناجحة في تربية أولادها ناجحة في إلزام الرجال والنساء ، أسر مش أفراد عشان كدا سيدنا إبراهيم وهو بيدعوا أبوه ، إوعووووا تنسو أهاليكو الغير ملتزمين ، إوعي تنزل جولات في الشارع وانت أخوك قاعد قدام موقع إباحي في البيت سيبه مش بقولك متزلش إلا لما تكلموا إنزل في الشارع وكلموا إوعي تنطلق في الدنيا ووالدتك لسه قاعدة تغتاب الناس 20 ساعة في اليوم وتتفرح على القنوات العادية ، لازم زي ما لينا جهد في الدعوة برا البيت يبقى لينا جهد في الدعوة جوه البيت ، القصة كبيرة والموضوع كبير جداً والسورة عظيمة والسورة محاورها كثير ، آخر نقطة معانا قبل أن نختم ترابط السورة قلنا الترابط ما بين الأنبياء دول إن كلهم اتعرضو للقتل ، قلنا إن الرابط ما بين الأنبياء دول إن كلهم عاشوا مراحل رهيبه ولكن صمدوا ، قلت إن الرابط ما بين قصة زكريا وما بين يحيى ومريم وعيسى عليهم السلام بعدها إن دول الثلاثة طلبة بتوعه، طلع يحيى مرتبط بآيات الله القرآنية " خُذِ الْكِتَابَ بِقُوَّةٍ " طلعت مريم مرتبطة بآيات الله الكونية " إِنْتَبَذَتْ مِنْ أَهْلِهَا مَكْنًا شَرْقِيًّا " مشاهد الشروق. طلع عيسى عليه السلام مرتبط بالدعوة إلى الله " وَجَعَلَنِي مُبَارَكًا أَيْنَمَا كُنْتُ " ، دي ثمرة التربية السليمة ، دي ثمرة الاكتساح التربوي، إن الناس متطلعش استمبات، الجامعات الإسلامية بتخرج استمبات ، تقابل أخ في الجماعة الفلانية في مدغشقر وتقابل أخ في نفس الجماعة في باريس الاتنين نفس الكلام نفس الأفعال استمبه ونول وبتنسج عليه ، إنما التربية السليمة بتاعت الأنبياء مكنتش بتخرج استمبات كانت بتخرج نماذج متنوعة ، كانت بتخرج دا يطلع داعية ، ودا يطلع بتاع أعمال خيرية ، دا يطلع بتاع تربية أطفال، دا يطلع بتاع عبادة وصوم وقيام، دا يطلع بتاع جهاد في سبيل الله دا يطلع عالم في القرآن والحديث، دا يطلع بتاع دعوة شبابية ، دا يطلع بتاع معسكرات شبابية ، دا يطلع بتاع جولات، دا يطلع بتاع كلمة حق في وجه ظالمين ، يبقى التنوع لو محصلش يبقى التربية دي فيها مشكلة يبقى التربية دي تربية استمبات لو محصلش هذا التنوع سورة مريم جاي بعدها سورة الكهف كلها تنوع وحركة وسورة مريم كلها محارب ، كأن عشان تتحرك وتستمر لازم يتشحن قلبك بالإيمان سورة هتشحن قلوبنا بالإيمان يا جماعة، التفاصيل الحقيقة

كثير جداً صعب إن إحنا نستقصيها كلها ولكن إحنا مشينا على المنهج بفضل ومنة الله أول مرة ، ويكفي هذا نجاحاً في السورة اللي ذكر فيها اسم الرحمن 16 مرة يعني لو معرفتش اسم الرحمن من هذه السورة مش هتعرفه ، الحته التاتيه لو مفهمتش هنا السورة النص الأول منها بيتكلم عن عطاءات الله لأولياؤه والنص الثاني بيتكلم عن عقوبات الرحمن لأعدائه السورة دي بين إيدينا اهي ربنا فتحها لنا أهوه ربنا رزقنا فتحت المصحف أهوه ربنا اكرمنا ومن علينا أهوه يا جماعة اللهم لك الحمد، قدامنا زي ما قولتلكوا الخطة إن انهارد هيبقى المقدمة واتكلمنا بقدر الوقت عن المقدمة طبعاً فيه آيات كثير جداً جداً في التعريف بالسورة ولكن أنا مش هقدر أدي السورة في عشرين مرة ، أنا ملتزم زي مبقولكوا عايز أدي إضاءات سريعة كدا بحيث إن القلوب ترتبط بالتفسير وبحيث إنك لما تروحي انهارده تصلي قيام الليل بسورة مريم تقدري قلبك يعيش معاها والمجهود الباقي عليكموا ، هنعمل ايه بقى يا جماعة؟؟ إن شاء الله بإذن الله السورة نفسها ، الخطة المبدئية والله أعلم " هو الذي يسيركم " الخطة المبدئية إنها الخمس مرات بإذن الله هتخلص على خمس مرات وفيه مرتين استثنائيتين في النص ، مش هقولكوا دلوقتي هيقوا وقفات مع إيه بس ملهوش دعوة بالسورة آيتين في النص لازم هنقف مع الموضوع بتاعهم بإذن الله ، أية هتبقى بعد الدرس القادم يعني الدرس الجاي لا اللي بعده إن شاء الله ، وآية هتبقى بعد حوالي شهر ودي هتبقى وقفه من أخطر وقفات حياتنا على الإطلاق ، مهمة هنكلف بيها وهتبقى من أخطر وقفات حياتنا بإذن الله ، السورة هتتفرغ على انت بإذن الله ، الأخوة بتوعنا هيفرغوها فوراً بإذن الله على موقع الطريق الى الله والسورة هتتنسق شوية الكلام بتاعها ، و تنزلكوا هتنزل تبقى مذكرة اللي عايز يشتريها مذكرة تمنها بـ 50 قرش ولا حاجة وهتبقى موجودة على النت اصلاً هتاخذوا المذكرة دي وهتذاكروها مرة بمرة بقى أو مرتين بمرتتين وانتو أصلاً بتذاكروا من تفسير إيسيه؟؟ تفسير ابن كثير دا اللي المعتمد عندي دلوقتي أيمختصر لابن كثير أي مختصر مختصر لابن كثير لـ أحمد شاکر رحمه الله، العمدة أي مختصر لابن كثير إحنا بنمشي عليه ومش هنخرج عنه إن شاء الله + الكلام اللي احنا شرحناه هنا بعد ما نخلص السورة هنعمل امتحان عليها امتحان شامل للرجال والنساء وللت برده لشباب أخوة وأخوات انت الامتحان هيبقى إن شاء الله بإذن الله فيه جوائز ، الجائزة الأولى حتى الآن عمرة دي خلاص خلصت بإذن الله سبحانه وتعالى ولا زلنا نسعى إننا نزود أمر الجوائز ان شاء الله عشان يبقى فيه حافز غالباً اللي هيحاول يكسبها إن شاء الله ونحاول انه يطلع معنا في شهر 1 اللي هي عمرة التريه 3 بإذن الله سبحانه وتعالى ، المفروض إن المسابقة هتبقى بفهم السورة وحفظ السورة ، فالمفروض يا إخواني إن كان الترتيب إن هنعملكوا ترتيب قبل الدرس من العصر للمغرب يوم الجمعة للرجال

وللنساء ولكن الأخوة القائمة على هذا الأمر لم ترتب هذا الموضوع إلى الآن ، هو إيه اللي خلاص طب مقولتليش ليه إنه خلاص طيب مش أنا المفروض أعرف إنه خلاص ، ادفع 50 جنيه مااشي إن شاء الله ساعتين ومنتقابل بإذن الله سبحانه وتعالى ، في تحفيظ يا جماعة سبحان الله ، تصدقو ان فيه تحفيظ وانا معرفش .. يعني مفيش مشكلة الحمد لله ان شاء الله بإذن الله بكرة هتكبرو وتعقلو ان شاء الله مفيش مشكلة لازم نصبر ، يعني أنا كلفت الأخوة إن يبقى فيه تحفيظ قبل درس الجمعة للرجال والنساء بعد العصر يعني من العصر لغاية الساعة اللي قبل المغرب دي يتعمل فيها تحفيظ لسورة مريم ويتعمل فيها كمان مجلس تجويد مع بشمهندس علي زياده مجلس تجويد لسورة مريم كمان يعني الرجال يبجوا فوق والنساء تحت عصر الجمعة من أول الجمعة الجاية هيبقى المحفظين والمحفظات موجددين بإذن الله سبحانه وتعالى من أجل حفظ وتجويد سورة مريم عشان يبقى انت ماشي في الموضوع ، خلاص يا إخواني وصلنا لإيه دلوقت ؟؟ وصلنا بإذن الله سبحانه وتعالى إن الأخوة هيبجوا للتحفيظ في عصر الجمعة بإذن الله سبحانه وتعالى يبقى إحنا كدا ماشيين في حفظ مريم ماشيين في تفسير سورة مريم ماشيين في مذاكرتها انتوا طول الأسبوع بقى عايشيين معاها في قيام الليل يبقى إحنا بعد كدا خرجنا بسورة تخيلوا بقى بعد كل شهرين خرجنا بسورة في السنة خرجنا بست سور وقمنا جايين في المواسم زي ماعملنا كدا في عشر ذي الحجة عملنا سلسلة في سورة إيه ؟؟ سورة الحج قمنا مخلصين سورة الحج وعملنا إمتحان عليها وفي الحفظ ووزعنا جوايز عليها تخيلوا بقى لما كل سنة نخرج بـ 7 أو 8 سور تخيلوا بعد 3 أو 4 سنين يبقى المستوى في العلاقة بكتاب الله ايه يبقى شدو حيلكو يا إخوانا وربنا يفتح عليكموا يارب وربنا يوفقكو اتفقنا با جماعه ان شاء الله بإذن الله متفقييييين هاهنا خلاص بإذن الله سبحانه و تعالى نسأل سبحانه وتعالى أن يفقهنا في القرآن وأن يجعلنا من أهل القرآن الذين هم أهلهم وخاصته